

Na Radisson Aruba Resort Casino & Spa Aruba.com a keda lansa

PALM BEACH – E Aruba Tourism Authority a organiza un fiesta na Radisson Aruba Resort Casino & Spa na honor di e lanzamiento oficial tan anticipa di www.aruba.com, e isla su website ultra moderno cu ta rediseña y renoba.

E web site ta na curazon di e isla su campaña dibertido y excitante di mercadeo y promocion.

Na 2009, Aruba ta disfrutando di visibilidad halto, specialmente na Merca, cu e campaña titula “90.000 amigo cu bo no a conoce ainda.”

E campaña ta den pleno accion actualmente y por ser mira riba billboards, den varios cinema, den prensa skirbi y na radio.

E ta invita bishitantenan pa un isla special yen di solo y playanan perfecto.

E campaña a wordo concebi pa diferencia Aruba den e ‘lama di similaridad,’ y el a wordo funda pa e Aruba Tourism Authority cu un inversion di Awg 31 miyon, fortalece pa un fondo di contingencia di Awg 18 miyon y e contribucion di e Aruba Hotel & Tourism Authority cual tabata un suma di Awg 8.7 miyon.

Tur e avisonan di Aruba na Merca ta dirigi e consumidornan na e website nobo di Aruba.com, unda nan por haya informacion rico y completo, cual ta crea un vision di e vakantie riba nos isla, creando e deseo di bishita Aruba y fomentando soñonan di un dushi vakantie.

Siman pasa, den e Radisson

Grand Caribbean Ballroom, e website nobo a bira un realidad, lansa pa Myrna Jansen di ATA, y Rob Smith di AHATA.

El a revela cu ademas di e capacidatnan tradicional di website, Aruba.com tambe ta ofrece networking social -- mescos cu Face Book - - unda hendenan local y bishitantenan por socializa, comparti experencianan y bira amigonan.

Aruba.com ta e prome den su concepto pa tambe ofrece e hospitalidad, amistad y networking social na e isla su habitantenan, kendenan ta ser invita pa registra, bira envolvi, interacciona y comparti experiencia nan cu bishitantenan.

Mientras cu AHATA, representando e sector priva, ta dirigi e website su sistema di reservacion y aspecto di negoshi, ATA, representando e sector publico, ta responsabel pa e contenido y ta encarga pa update e website cu e detayenan mas nobo y corecto.

Bo ta ser invita pa bishita Aruba.com, registra y load bo perfil, bo videonan y bo potretnan. Registracion ta facil, riba e home page di aruba.com.

Bira un miembro y conoce e “90,000 amigonan cu bo no a conoce ainda.”

Riba e potretnan por mira e encuentro na Radisson Aruba Resort Casino & Spa, unda cu e Aruba.com nobo a haya un introduccion hopi celebratorio for di e personalidadnan di ATA & AHATA.

